

Impressiunà dal Grischun multifar

Ultim pled d'avertura da Martin Aebli

■ (anr/fa) La sessiun da zercladur è per Martin Aebli (pbd, Engiadin'Ota) l'ultima sessiun ch'el maina sco president dal cussegl grond grischun. En ses pled d'avertura ha el menziunà l'importanza da las uniuns per la coesiun. Glindesdi ha cumenzà per las deputadas ed ils deputads al cussegl grond ch'han demissiunà lur ultima sessiun a Cuir. La sessiun d'avust entschaivan alura ils novelegids deputads ensemen cun lur collegas reelegids la lavur parlamentara. Er per *Martin Aebli* è questa sessiun en in regard l'ultima: Sunter in onn èsi uss l'ultima giada ch'el presidiëscha il parlament grischun. I saja stà in temp fitg captivant ed instructiv, ha el ditg a chaschun dal pled d'avertura, «jau hai dastgà represchentar il chantun a numerusas occurrenzas en tut il Grischun e discurren cun bleras persunas da differentas regiuns e valladas.» Aebli ch'è vegnì reelegì dumengia dal suveran en Engiadin'Ota è stà impressiunà da la multifarietad dal chantun, «ma er a vesair quant differentas che las incumbensas e las sfidas èn en ils differentas territoris dal chantun.» Grond'impressiun l'ha dentant fatg er insatge auter.

«Prestaziun indispensabla per chantun e stadi»

Aebli ha menziunà la blera glieud en Grischun che prestia lavur voluntara a favur da la societad. «Questas persunas meritan grond respect per las nundumbraivlas uras ch'ellas impundan per lur instituziuns u uniuns», ha el accentuà, «senza questa prestaziun na fiss il chantun Grischun, ma er l'entira Svizra, betg quai che nus vesain oz di per di.» Quai n'è, sco ch'el ha cuntinuà, betg mo en il sector social uschia, mabain ha lieu en



Per Martin Aebli èsi stà l'ultim pled d'avertura sco parsura dal cussegl grond.

MAD

tut ils secturs da la societad. Impressiun ha fatg ad Aebli er a vesair quantas tradiziuns e valurs che vegnan tgiradas e vividas ed er transmessas durant onns ed onns da differentas uniuns.

«Stimar las prestaziuns da questas uniuns»

I saja en il temp accelerà dad oz impurtant che questas valurs vegnian tradidas e survegnian er la stima necessaria, ha cuntinuà il president dal cussegl grond e punctuà che la stima na dastgia però betg vegnir reducida mo a l'aspect finanziàl. «Anzi, ins duai er esser preschent activamain a las occurrenzas en tut il chantun ed undrar uschia las sten-

tas da las uniuns tras l'atgna preschientëscha», ha appellà Aebli, «uschia stgaffeschian ins er ina coesiun en la societad, quai che daventa pli impurtant che mai en il temp actual.» El ha menziunà che fitg bleras da questas uniuns pateschian oz d'ina diminuziun da commembras e commembers e ditg ch'i na sa chapeschia betg da sez ch'ins s'engaschia voluntariamain per in tema u ina chaussa. «Nus sco politichers e politicras pudain era prestar ina contribuziun en chaussa ed ans mussar activamain a chaschun d'occurrenzas ed ans participar ad uniuns», ha accentuà Aebli, «e quai betg mo avant las elecziuns, mabain durant l'entir onn.»